

Урок №23

Дарснан кІул: Ктикьу табигьсуз предложенийриъ дивру пунктуацияин ишарйир.

1.Ктикьу табигьсуз предложенийр чиб-чпик союзарин кюмекниинди китІру. Табигьсузвалин союзар, мялум вуйиганси, шубуб группайиз жара шула: **китІбандар** (-на, -ра, ва, гьам-гьам), **гьаншарвалиндар** (хъа, амма, аммаки, анжагъ), **жара апІбандар** (я-я, гагъ-гагъ).

2.Ктикьу табигьсуз предложенийр союзар ктарди, тек саб интонацияин кюмекнииндира китІри шулу. Месела: *ЦІа кабхъну а, дустар, вари дюн'яйик, намуснан пайдгъарра вари за духъна* (Б.М.).

Союзар ктру ктикьу табигьсуз предложенийри чиб сабси вая саб-сабдин къяляхъди гьюрайи къюб вая саб-швнуб гьядиса улупуру. Месела: *Хъад гьубшну, чвулра улубкъну. Хябяхъ гьабши, лиж гьафи, хуларийъ дишла аквар кархъу.*

Гьам **союзар кайи**, гьамсана **союзар ктру табигьсуз** предложениемик кайи аьдатнан предложенийр, аьдат вуди, чиб-чипхъан запятйириинди жара апІуру.

Къайд. Эгер **ва** союздиинди китІрайи къюб аьдатнан предложениемиз кпикьу табигьсуз предложениемийъ уртагъ вуйи, яна къюбидизра тялукъ вуйи, саб член ади гьабшиш, думу дюшюшнаъ дурар запятаяйиинди жара апІури шулдар. Месела: Ич гьулаъ гизаф цІийи хулар дивра **ва** йимишдин багълар кивра.

Саспи вахтари, эгер кпикьу табигьсуз предложениемик кайи аьдатнан предложенийр гизаф гьатІарццдар вуди ва чпигъра запятйир айидар вуди гьашиш, думуган дурар точкана запятаяйиинди жара апІуру. **Месела:** Гюлюшан багъдиъ сес ипну а кІажари; вичун гьарин цирклариин рагури, ширин мукъмар кІура рагру жакъвари (Халкъд.).

Мяна жигъатнаан чиб-чпиз гьаршу вуйи къюб аьдатнан предложениемикан ибарат духънайи союзар ктру ктикьу табигьсуз предложенийриъ дурарин арайиъ тире дивру. **Месела:** Тур ичвуб – гардан

йизуб. ГакІвлар ккудукІура – пич абгурадар.

Табшуругъар:

1. Ктикъу табигъсуз предложенйириъ айи аьдатнан предложенйир улупай, ва, дулар чиб-чпик фици китІнаш, гъаврикк ккаай.

Биціи жил.

Гагъ учхъан ярхлаъ, гагъ багахънаси бомбар ахърайи, ва шид прожекторарина жюрбежюр гюллийри гъар жюрейин рангариинди улупурайи. Учу гъарсаб дакъикъайиъ гъюжум гюзлемиш апІурайча, амма му ляхин хабарсузди гъабши. Улихъ хъухърум гъапІу, цин ялав завуз утІубччу, ич сейнер минайин алабхънийи. Узуна лоцман сар-сарин гъвалахъ дийигънайча, учу сатІиди завуз гатІархъу.

2. Жутди тувнайи предложенйир, табигъсузвалин союзар гъяъри, ктикъу табигъсуз предложенйириз илтІикІай.

1. Лиж дуфна. Ич хюни дуфнадар. 2.Учу ахидича. Уву мугъаят йихъ. 3.Марччар сивуъ а. Малар галиъ а. 4.Вари рази гъаши. Айваз рази гъашидар. 5.Йишвар ярхи шула. Йигъар – жикъи. 6.Апрелин ваз кубкІрайи. Гъавйир мегъел мани духънадайи. 7.Йиз юлдишиз гъюрар айи. Узуз дулар адайзуз. 8.Гъийин дарсар рягътидар вуи. Учу дулариз ухди гъязур гъашича.

3. Предложенйир, гъидирчнайи пунктуацияйин ишарйир гъяъри, кидикІай. Диврайи ишарйирин гъаврикк ккаай.

1. Гъизилин чвулра ккудубкІу гъалин йифар айи къюрдра гъафи амма абайиз гъи гъабхъундайи (М.Аь.). 2.Сакинат лихуз гъафи гъул даима беневши рангнан хъюмру капІнайиси рябкъюйи гъулна искІал кайи гюнийир ярквру ккапІнайи дагъдин машинак кабснайиси гъибгъуйи (Х.А.). 3.Узу ботдиз багахъ гъашиза лоцман Соколовра дидихъна гъафи (Л.Б.).

4. Ктикъу табигъ предложенйир ишлетмиш апІури, учву ктабгъу темайиз ихтилат бикІай.

Урок №24

Дарснан кІул: Кпикъу табигъ предложениейикан уьмуми мялумат.

Дарснан метлебар:

1) урхурайидар кпикъу табигъ предложениирин арайиъ ишетмиш ишу табигъ'валин аьлакьайин гьякънаан гъавриъ тІауб;

2) табигъ предложениейин кІулинубдихъди грамматика жигъатнаан айи аьлакьа мялум апІуб (союзар ва союзвалин гафар);

3) табигъ предложениейин кІулин предложениейин составнахъди фициб аьлакьа аш, гъадму мялум апІуб (кІулин предложениейиъ фуну член табигъ предложениейи аьлава апІураш, ккатІабциураш, гъадму гафназ асас фикир тувуб);

4) кІулин предложениейиз тялукъ вуйи табигъ предложениейи фициб йишв бисураш ва гъаму дюшош пунктуацияиъ фици къайд апІураш лигуб.

Лекция.

Ктикъу табигъ предложениириз тялукъ шулайи предложениирин арайиъ айи табигъ'валин аьлакьа аьгью апІбан бадали, ктикъу табигъсуз предложениирна ктикъу табигъ предложениир чиб-чпихъди теври, къатІивалин мисалар разбор апІури, урхурайидар гъавриъ тІауб лазим шулу.

Месела: *Буран яваш гъабшиш, ва учу рякъюъ учІвча.*

Буран яваш гъабшиган, учу рякъюъ учІвча.

Сабпи предложениейин анализди мялум апІураки, кпикъу предложение мяна жигъатнаан вуйи аьлакьайин, хъа грамматика жигъатнан табигъсузвализди ва союздин кюмекниинди саб-сабдик китІнайи къюб аьдати (барабар) предложениирикан ибарат духъна.

Къюбпи предложениейиъ айи кпикъу предложениейин паяр, предложениейин сабпи пай тмунубдикан асиллу вуйиб мялум шулахъуз, гъаз гъапиш сабунуб тмуну предложениейин пайнахъна диву суалназ жаваб шула (фила рякъюъ учІвну? - *Буран яваш гъабшиган* - кпикъу предложениейин табигъ пай).

Къайд апІуб лазим шулуки, эгер урхурайидари табигъ'валин союзарна союзвалин гафар хътрахъди жара апІури гъашиш, кпикъу табигъ предложениемин составнаъ айи табигъ предложениемин паяр дурари читинвал дарди аьгъю апІуру.

Табигъ предложениемин пайну кІулин предложениемин пайнахъди вуйи аьлакъа мялум апІбан бадали, чахъан табигъ предложениемин пайнахъна суал диврайи ва табигъ предложениемин пайну чахъди дюм-дюз аьлакъалу апІурайи гаф урхурайидариз мялум апІуб лазим шулу.

Кпикъу табигъ предложение аьгъю апІру сифтейин девриъ урхурайидарикан гъамцдар аьгъювалар ккун апІуру:

Кпикъу предложениемин жюре аьгъю апІуб, кІулин предложение улупуб, табигъ предложениемин пай жара апІуб, табигъ предложениемин пайну кІулин предложениемин пайнаъ чаз тялукъ шулайи гаф (тяйин апІбан ва аьлава апІбан табигъ предложениемин) мялум апІуб, чпий табигъ предложение тамамди кІулин пайназ тялукъ вуйи предложениемин (**йишван, вахтнан, мураднан, метлебнан, себбнан, гъаншарвалин, шартІнан, натижайин ктикъу табигъ предложениемин**), кпикъу табигъ предложениеминъ табигъ предложениемин пайнан йишв улупуб, союзар ва союзвалин гафар тяйин апІуб, пунктуацияйин гъаври хъуб.

Табшуругъар.


1. Исихъ тувнайи предложениеминхъ, скобкйиринъ тувнайи суалназ лигну, табигъ предложениемин хъаай, лазим вуйи йишвар'ин запятйир дивай.

1. *Даграъ шид цІиб дубхъна (гъаз?)... . 2.Гъи хябяхъган фермайиз (фтин бадали?)... гъягъюрза. 3.Лап ухди жилар гъутІурччвнийи (натижайинъ фу гъабхънийи?)... . 4.Хулаъ маниди дайи (фтиз дилигди?)... .5.Жанаври агълиж ярквраз хъчІубхънийи (фициб шартІниинди?)... . 6.Баяр чардхикк жин гъаши (фу себбназ?)... . 7.Дадайи рии чав дирибинайи гъалвихъ дитри шуйи (фу метлебниинди?)... . 8.Ихъ гъял чІуруб шулу (фици гъабшиши?)... .*

2. Исихъ тувнайи предложенирихъ табигъ предложенир хъари, ктикъу табигъ предложенир дюзмиш апІинай.

1. Узу шагъриз гъягъюз гъязур гъашиза.
2. Закур сейриз гъягъидихъа.
3. Мархъар ургъуз хъюгъю.
4. Студентари тІумтІун шираригъ зегъмет зигурайи.
5. Темпли йигъар дахъну адауйи.
6. Йиз дуст театриз ухди гъафну.
7. Кинойиз гъягъюз ккайча.

3. Гъаму схемйириз дилигну, предложенир дюзмиш апІинай.



Кпикъу предложениейиан айи агъювалар ахтармиш апІуб:

- а). Табасаран чІалнаъ чпин гъурулушдиз дилигну швнуб жюрейин предложенир шулу?
- б). Кпикъу предложение фицибдиз кІуру?
- в). Кпикъу табигъ предложение кпикъу табигъсуз предложениейихъан фит'инди жара шулу?
- г). Кпикъу табигъ предложение фицдар предложенирин паярикан дюзмиш шулу? (кІулин предложениейин пай ва табигъ предложениейин пай)
- д) Кпикъу табигъ предложениейиз швнуб жюре а? Дурар кудухай.